

欽定剿平三省邪匪方略

欽定剿平三省邪匪方略續編卷三十二

甲子年

九月初四日

庚寅

額勒登保那彥成方維甸奏言

臣額勒登保欽奉

上諭前據那彥成等具奏大兵議撤時陝省尙須酌留二三千名應如何酌派大員駐劄巡查鎮守之處妥爲議定具奏等因查寧沔一帶接連川甘爲陝省門戶本派總兵國興阿副將吳亨衍遊擊

德忠帶領寧夏涼州甘州各營官兵四千餘名
分路防範又紫陽之毛壩關一帶毘連川界亦
分駐延緩官兵一千二百餘名巡防搜緝現在
該處一帶久經寧謐此項官兵自應先行凱撤
但全數撤完又恐漢中寧沔一帶未免空虛茲
擬於寧夏官兵內酌留一千名協防漢中寧羌
一帶地方其餘寧夏涼州甘州延緩官兵四千

七百名卽凱撤回營尙剩防剿官兵一萬名一
俟德楞泰搜捕完竣同賽冲阿楊遇春各路剿
兵議撤時再將各官兵通行挑派將平素得力
之固原提標提屬兵酌留一千二百名河州鎮
兵八百名陝安鎮兵八百名共計陝西本省兵
二千八百名再於甘省西寧鎮兵內酌留八百
名寧夏鎮兵內酌留五百名共留防兵四千一

百名其帶領鎮將查陝安鎮總兵王兆夢係屬
本轄地方應留防邊界并仍隨時辦理本鎮營
務再酌留西寧鎮總兵九十帶領本鎮官兵至
將領內應酌留副將閻俊烈吳廷剛吳亨衍三
員叅將祝廷彪李朝顯二員遊擊廖世俊馬隆
伊星阿馬良棟楊得升張起鰲六員都司柯連
仲馬仕相祁祥宋鉞曹良臣王殿甲朱保呂天

俸八員以資分帶楊遇春係本省提督聲威素著且能得兵民之心應留該提督統領其分段駐守鎮撫之處必須在於三省交界要隘地方
臣額勒登保曾於上年具奏三省提鎮會哨章程仰蒙

皇上准行在案茲臣等復加酌核現在陝省南界之東接連川楚最關緊要應於所留官兵四千一

百名內令西寧鎮總兵九十帶本鎮兵八百名
駐紮安康紫陽屬之南天門漳河坪一帶巡緝
彈壓常川搜捕卽與川省之太平官兵會哨令
陝安鎮總兵王兆夢副將關俊烈帶領本鎮兵
八百名駐紮平利屬之八仙河一帶巡緝彈壓
常川搜捕卽與楚省二竹川省大寧官兵會哨
尚有官兵二千五百名卽交楊遇春帶領在西

面西鄉漢中一帶分派將領擇要分駐巡緝鎮撫與川省之廣元通江南江一帶官兵會哨常川搜捕並督飭九十王兆夢兩路搜緝該提督卽在漢中西鄉整飭新設營制訓練新兵以期兩有裨益其次應撤滿漢馬步官兵五千餘名均隨賽冲阿全行分別撤回各原營歸伍其楊芳所帶防江官兵一併撤回將六成剿兵鹽糧

卽行停止查照臣額勒登保會同前督臣惠齡
原定馬二步八營制辦理惟該鎮兵丁數年以
來常川在外搜剿防守尙未能歸伍按照馬戰
守糧分晰定額凱撤回營之日卽應照辦除馬
糧二成業經奏准外步糧八成應以四成作爲
戰糧以四成作爲守糧查明撤回兵內如有鄉
勇入伍著有勞績及年力強壯之人應均勻分

派以馬糧戰糧拔補設有不敷卽以本地招募者挑揀足額其餘仍歸入四成守糧作爲定額俾各兵丁知有差等自必勉嫻紀律以圖次第拔擢更足以收束身心至外省鎮將如南贛鎮喜明山西叅將哈豐阿等亦均一併凱撤楊遇春率同王兆慶九十統帶暫留官兵隨時往來督飭搜捕統俟明年各路山林委無伏匿零匪

地方全行寧謐楊遇春等再行帶領回營嗣後
再照前此奏定章程令提鎮等於春秋兩季會
哨俾邊界永臻寧固

臣

現於拜摺後卽起程回

京奏入

上命軍機大臣傳諭那彥成方維甸曰陝省邊界一
帶卽日零匪肅清自當留兵鎮撫茲據奏稱俟賽
沖阿楊遇春帶領剿兵議撤時通行挑派共酌留

防兵四千一百名交各鎮將等分段駐守仍留提督楊遇春統領所辦皆是但山林潛竄餘匪節經搜捕將次淨絕此時留兵分駐原因地方甫靖或恐尚有伏而未起之匪徒須藉兵力彈壓使知畏懼日久自可潛消倘奉行不善弁兵等或有意邀功必致借搜查爲名擾害良善濫殺無辜迨至查訊明確閭閻已受其累且又須將妄擊之弁兵正

法治罪豈非徒滋刑獄殊有關係現在額勒登保
卽日回京著那彥成方維甸通飭該鎮將曉諭兵
弁等各於界內留心防範如有逆跡已萌者白當
上緊嚴緝或實有形跡可疑之人亦應一律盤詰
固不可稍有踈縱亦不可任令貪功滋事此爲最
要至會哨一事不但此時卽應舉行竟當按照章
程永遠遵辦以鎮邊陲那彥成等亦當飭知該鎮

將實力奉行毋致日久生懈

同日那彥成方維甸奏言陝省應撤隨征鄉勇
一千二百三十九名先經額勒登保分路遣撤
交地方官送回安插已有九起連日復據興安
地方官開單具稟續又遣送鄉勇四起連前共
十三起業經全數完竣並據各廳州縣稟報前
來臣等按數核查除額勒登保在川遣撤川黔

二省鄉勇三百二十三名入伍三百二十六名
外其陝西交地方官分路遣送鄉勇內籍隸陝
西者較多有四百一十八名其餘籍隸甘肅等
省者一百七十二名先在平利興安按名點驗
委員護送出具印收節節稽查甚屬安靜現在
報充壯丁者八十一名又外省願在陝省充當
壯丁一名此外如有生計維艱陸續告充丁役

者亦飭地方官遵照章程仍准充役一體造冊具報奏入報

聞

初五日

辛卯

德楞泰奏言

臣

前乘賊匪被剿散逃

催令各路趁勢趕辦嗣楊遇春所追化龍山之賊由火石梁南竄當卽派員跟蹤並分路旁抄連日雨霧不止十七日吳廷剛等追至笋子坪

趕上賊尾隨卽率同都司朱承受守備朱福壽
等奮力仰攻斃賊三名賊敗上大梁官兵啣尾
追擊又殺賊一名餘匪散入老林向黃安壩石
梅子河長坪猪草河等處而遁二十日未刻吳
廷剛等趕至猪草河山澗探得賊匪散而復聚
藏於密箐之內卽帶兵冒雨直前搜剿該逆見
兵逼近齊力拚死突出經朱承受朱福壽率兵

追剿藍翎外委寧顯文李洪春等首先衝入登
時戳死執旗賊目二名餘匪敗上山坡有穿紅
馬褂賊目喝令賊衆壓下與我兵攪殺逾時又
斃賊匪四名兵丁王進敘蕭貴撲入賊陣將紅
衣賊目活捉餘賊沿河而逃官兵趕追又殺賊
二名生擒僞總管田昌美等九名撲岩跌死者
數名祝廷彪在磨盤寨老林搜獲僞元帥陳勝

魁等五名餘匪半棄矛桿零星而散二十五日
追至後坪硝厰溝老林又擒獲僞元帥胡萬富
趙應舉二名散賊唐應書一名殺斃賊口二名
賊匪二名豐紳探明賊匪潰散派令副將桂涵
遊擊張拱辰都司余步雲前來併力協捕在石
梅子河搜獲散匪劉發保蔣仁彥二名弁兵內
雖間有帶傷者均不甚重據各路將紅衣賊目

王添詔等並首級一併解營直驗其賽沖阿喜

明剿辦化龍山之賊二十餘名探得又匿於濫

河老林

臣

卽知會慶成並札飭慶溥呢瑪善等

密爲防範分帶官兵沿邊搜捕賽沖阿卽於十

七日冒雨同喜明督兵向五福庵石渣河前進

因賊未竄出令副將閻俊烈等由龍洞溝入山

令遊擊李廷珍等由賁溪溝光頭山進兵令外

委方永吉由圓梁金盆凹黃石板南進並知會
王兆夢由毛坪老鴉舖而來十九日李廷珍等
至朝陽硎殺斃散匪五名又據寨民王得玉等
捉送散賊一名王兆夢之守備王登科在石門
溝搜獲散匪一名守備狄廷杰等在石牌河林
內搜獲散匪三名慶成呢瑪善等在牛頭店老
林內捉獲散賊二名又平利縣之磨子岩軍功

寨首李淮等捉獲散賊二名均各錄供並將獲犯
首級先後解到其馬瑜田朝貴所追南竄入川
之賊二三十名由馬家嶺直向南逃馬瑜田朝
貴等分兵由柴扒西溪口桐油壩數路躡蹤搜
捕探得該逆或一二人三四人零星向大寧之
百里荒紅池壩西流溪天鵝池萬春河散逃隨
派員分投追捕十七日叅將羅思舉在三溪子

等處搜獲僞元帥杜春一名殺賊二名十九日
龍必達在鹿池老林殺賊一名又湯家壩寨民
在岩硎內搜獲僞元帥苟朝賢一名錄供將獲
犯二名並各首級解送到營其豐紳一路據報
都司左位在瓦坪林內搜獲苟逆股內散賊一
名在大塘口盤獲零匪一名在觀音岩拏獲土
匪一名錄供前來

臣

訊據苟朝賢供苟文潤是

我胞叔元帥羅思蘭同我們都聽他調度王世
貴是羅其清的徒弟今年春間在八仙河山裏
合夥王作經是傳教老掌櫃他兒子王添詔是
個小元帥自從趙洪周把我叔殺死後大家害
怕都要散夥我同苟朝富們南走想回家去不
想又殺散了我被拏住王世貴們不知往那裏
去了這兩顆首級實是元帥舒正國胡治的詰

以苟朝九下落又供苟朝九是我叔伯哥子自
南山過江後就不見了實在不知他的下落是
實據王添詔供我是王光祖的兒子我父親死
了投到苟文明營裏拜寄王作經爲父苟文明
見我出力就放我當總兵過了江來苟文潤纔
封我做元帥前月三十夜裏苟文潤被殺死了
初二日夜裏又被兵衝散各自逃生王世貴和

我父親不知逃到那裏去了餘供與苟朝賢相
同詰之各獲犯公供相同所有各路獲犯

臣先

後訊明卽將僞元帥苟朝賢王添詔杜春陳勝

魁田昌美胡萬富趙應舉七名鞠剴處死其餘

夥匪一概正法難民三人當卽省釋又據九十

稟報准札剿辦金溪河之賊二十餘名派令遊

擊廖世俊都司朱保分投截剿十五日在林內

殺斃賊匪一名生擒散賊一名又有三賊被剿
情急跳入天坑無從撈獲餘匪向西南川界之
盤河奔逃現已躡蹤趕剿等語

臣

又飛劄豐紳

並嚴飭達自祥分兵截擊其獲賊令訊明正法

所有各路官兵並寨民等擒斬首夥賊匪

臣

查

驗後均各分別照格給賞計連日邊界各路搜
捕除繼死滾岩不計外拏獲苟逆首夥散匪共

三十四名共繳首級二十五顆

臣

查苟逆餘匪

連日被兵分投嚴捕均已零星四散每起所剩
只有數人多亦不過十數名日伏夜竄瓦解米

消

臣

已飛札川陝各屬文武並沿邊沿江軍民

人等在於各隘口嚴密盤詰並移知勒保那彥
成方維甸飭屬一體照辦現在兩省兵力萬餘
此起散匪如已淨盡而界上老山林內亦應分

兵通行排搜一次方可放心

臣

與賽冲阿楊遇

春就近會商將濫河之賊十餘名交王兆夢搜
拿賽冲阿督率喜明閻俊烈侍衛彥丕勒協領
額爾奇等帶馬隊一百名官兵二千名分兵三
路沿山排搜前赴陝境西北之定遠廳一帶設
有西逃零匪即可截擊弋獲楊遇春一路令於
陝西之東北八仙河一帶分兵在於山內逐處排

搜遼自祥九十令在大小白河坪中路一帶楊
芳在陝省腹地紫陽沿江巡邏豐紳在於川省
太平界上之黃墩水寨子中路一帶馬瑜旧朝
貴現在川省東面大寧之萬春河紅池壩等處
搜捕卽令在彼分兵偵緝馬國銳仍令在開縣
大寧太平等處山內搜緝雷仁令在川省腹地
之綏定一帶彈壓搜防

臣

擇於兩省適中太平

之城口暫駐調度該處相距各路均不甚遠往來文報聲氣聯絡其陝省應行酌留官兵以資彈壓等事俟額勒登保那彥成方維甸奏奉

諭旨知照前來

臣

臨時酌量情形遵照辦理其川省

應留防兵及遣撤鄉勇等事

臣

已函致勒保詳

商俟酌定後再行奏請

訓示現在餘匪掃蕩

臣

謹另摺馳奏捷音伏祈

恩鑒

是日德楞泰由驛六百里奏言竊

臣仰蒙

恩命畀以軍旅重任自接辦以來該逆等人數雖屢
無多皆係歷年各股剿散猾賊詭譎百出兇悍
異常每於老山菁林竄匿抗拒希圖苟延殘喘
糾結各股剿散零匪及土匪往來滋擾日久稽
誅仰荷

聖明指授機宜復加獎賞官兵倍加奮興自賽冲阿到營

臣

與之籌辦陡巖尖興隆坡竄逸股匪一

戰而殲擒首逆苟文華王振獨眼龍謝尙玉賈

燦華王安書等併夥匪多名始挫其鋒該逆敗

殘旋轉朝東暮西時秦時蜀迫額勒登保到營

臣

復與會合籌商分路督剿該逆自知滅亡在

卽日夜狂奔

臣

等親身入山策勵將士陟險絕

幽到處窮追祇因一時未能得手不克迅速蒞

功焦灼悚懼日夜靡寧追

臣接受

欽差關防後欽承

府畧憑仗

天威事機順利前於鳳凰寨痛加剿殺將首逆羅思

蘭並各號頭目苻庭伏李如玉周天良王宗福

紀友亨蕭昌奉王仕奇趙剛雲等設法擒斬賊

勢少衰迫軍功趙洪周將苟文潤殺斃餘匪竄
出老鴉絆復被楊遇春埋伏衝剿截殺多名賊
勢瓦解星散

臣

復知會賽冲阿楊遇春馬瑜豐

紳慶成並飭總兵田朝貴喜明王兆夢慶溥等
各將兵勇分爲多路到處嚴密搜捕並通飭川
陝沿邊州縣文武協同緝拏連日陸續又斬獲
大小頭目苟朝賢王添詔杜春陳勝魁田昌美

舒正國胡治胡萬富趙應舉馬化龍僞總管並
夥匪多名此股餘匪掃除淨盡現又飛行各提
鎮等再於沿邊山內密行排搜縱匿三五零孽
不難剋日肅除所有善後應行留防彈壓一切
事宜俟臣酌定後另行奏請

訓示外當茲首惡盡膏斧鉞苞孽悉淨根株憫小醜
之無知窮同困獸望

天兵之所到快翦奔鯨窮谷荒陬復萬家之井畝通
屋列市達百貨於關津九年之兵燹全消三省
之閭閻永靖是皆仰賴我

皇上睿謨廣運

勝算先操故能

神武懋昭全功底定捷奏載馳夫露布凱旋齊唱夫

饒歌臣猥以駑駘膺斯鉅任欽承

磨斷聿彰撻伐之威幸際

膚功喜上

昇平之頌

臣

不勝慶幸懽忭之至謹繕摺馳

奏以

聞奏入

上諭內閣曰本日德楞泰由六百里遞奏餘氛掃蕩
三省全功告蒧一摺覽奏曷勝欣慰三省剿辦零

匪一事上年七月間額勒登保德楞泰以成股之
賊業經次第翦滅地方廓清當經馳報全捷嗣緣
南山內逃匿之匪三五成羣復行嘯聚自當乘大
兵未撤之際嚴行搜捕以期淨絕根株特命額勒
登保德楞泰先後接辦一年以來官兵倍加奮勉
四路窮搜川陝一帶大山老林蹤跡殆遍復將首
逆苟文華羅思蘭苟文淵及各號頭目偽總管等

以次殲擒其夥匪皆悉數斬獲三省地方更無一
名遺孽全境寧謐此實

天眷

考恩垂庥篤祐從此海宇枚寧永銷兵革可與率土蒼
生共享昇平之福感謝之餘彌深兢惕額勒登保
德楞泰前此奏報殲獲餘匪多名節經加恩賞還
雙眼花翎紫韁并原有爵職其將領等世職翎頂

并所得陞銜亦均一體賞還此八奏報全捷除額
勒登保現已遵旨起程回京外德楞泰著加恩再
交部從優議敘並加賞玉吉祥牌玉四喜搬指玉
翎管鑲寶石帶頭各一件黃綳珊瑚豆大荷包一
對小荷包四個將軍賽冲阿提督楊遇春豐紳馬
瑜慶成總兵田朝貴喜明王兆蔭慶溥著再加恩
俱交部議敘副將吳廷剛著軍機處記名遇有總

兵缺出卽行簡放並發去琺瑯翎管五個瑪瑙鼻
烟壺五個翡翠玉搬指玻璃搬指各五個大荷包
五對小荷包十個鑰匙袋五個著交德楞泰分賞
出力各官員又再發去一兩重銀牌一百面一兩
重銀鏤一百個五錢重銀鏤二百個並交德楞泰
查明兵勇內出力者酌量賞給其摺內硃筆圈出
剿賊出力之都司朱承受守備朱福壽外委甯顯

文李洪春兵丁王近敘蕭貴六人著德楞泰查明
伊等應如何陞擢之處卽分別保奏候朕加恩以
示鼓勵

同日

上命軍機大臣傳諭德楞泰曰據德楞泰奏餘匪掃
蕩三省全功告歲情形一摺覽奏欣慰已明降諭
旨將德楞泰交部從優議敘提鎮將備等分別施

恩並頒給賞件示獎矣此後散匪愈剿愈少德楞
泰現已分飭鎮將逐處排搜並通札川陝楚各屬
於各隘口嚴密盤詰但王作經王世貴苟朝九三
逆尙未殲獲且訊據苟朝賢供亦稱不知三逆下
落德楞泰仍當嚴飭各路一體留心將三逆設法
訪查務獲如果已就斃亦查明實在証據方足緝
信不可稍有疎懈致令漏網此非故爲已甚正所

謂除惡務盡不留遺憾之意嗣後遇有擒獲要犯
祇須用四百里奏報足矣至留兵彈壓一節昨已
據額勒登保會同那彥成方維甸籌議具奏分段
駐守自己知照德楞泰但鎮將等帶兵分駐不可
無統率之員德楞泰威名素著現據稱於城口暫
駐自係居中扼要之區德楞泰竟當在彼多駐數
月至開春後地方實已敕寧防兵可以撤遣時再

回成都亦不爲遲至留防官兵原爲彈壓地方潛
消伏孽倘奉行不善或弁兵有意邀功恐不免有
擾害良善濫殺無辜昨已諭令那彥成等通飭遵
行德楞泰當一律飭知諭令弁兵等惟當偵緝奸
匪如實有形迹可疑之人自應趕緊查獲不可任
令妄拏滋事爲要

臣
等謹按邪匪滋事之始醜類實繁而

王師轉易克捷邪匪就淨之日逃亡無幾而殘喘翻
致久延何也川陝楚豫之郊藍黃線白之號
合其黨與顯抗顏行爰勵師千載揚我武靡
壘則功成掃箠追逋而勢若催枯是猶雷激
而鸢馳無殊草薶而禽獮故每戰俘馘之數
不可勝紀合計凡數十萬人焉迨七年十二
月大功告蒞之際餘匪不及二千然而其勢

愈殘其蹤愈詭偵師行之將近預辦他途逢
戰潰而奔逃還分數股官兵勇於剿賊而難
於遇賊賊衆不能當兵而工於避兵我欲聚
而殲旃彼維散而鋌走曩之一戰掃除者茲
數戰而未能盡除曩之一月屢捷者茲數月
而僅聞一捷截至八年七月奏報蕩平之日
零匪猶數百人此其未盡之游魂豈比方張

之黠賊顧乃時出時沒倏東倏西嘯聚間雜
夫游民烏合不皆其同號過冬率皆伏匿乘
夜則又摸樁將士等奮勉搜尋不遺餘力懸
崖萬仞至徒步以跟追風雪連旬或離營而
露處江漲則提船守渡箐深而列卡防山自
春徂冬匪朝伊夕類皆零星就縛三五成擒
故又稽一載有餘而餘氛始克淨盡此如投

宜掩兎罽穴取狐誠欲速而不能必殄滅之
無遺育也我

皇上盼捷焦勞成功詳慎未始不

加之催促而於久役尤

憫其艱辛時亦薄責其遷延而於急攻仍

誠其冒昧是以人人咸奮所向爭先加以

磨算無遺

神樞密運於一賊首之未獲必窮究焉而識所歸於
一賊數之不符必詳查焉而得其實

圖維必周事後

區畫常在幾先蓋

朗燭無遁形

明威無漏網三省肅清之效豈不全繫於

一人之謨畧也哉

欽定剿平三省邪匪方略續編卷三十三

甲子年

九月初五日

辛卯

吳熊光奏言陝省賊匪前經楊

遇春等叠次截剿勢已殘敗日來連據探報官兵沿途追擊均有擒斬寨民亦有縛送卽日殲捕全竣現在提臣慶成與總兵慶溥等均在陝省地界幫同搜剿因思該匪一經撲滅後所有楚省鄉勇客兵卽應次第全撤至本省官兵本

可一併凱撤回營但用兵以來業經九載地方
匪類棍徒以及曾充夫勇之人未免桀驁難馴
兼之鄖宜一帶跬步皆山與川陝地方犬牙交
錯沿邊要隘處所尙須暫駐官兵巡查彈壓使
不敢有生心滋事之徒倘有一二在逃零匪並
可就便緝捕伏查楚省隨營鄉勇如總兵吉林
泰副將呢瑪善原各帶勇五百名早經遣撤安

頓都司麻光裕所帶練勇五百名昨亦

奏明分別遣散現又將總兵李天林一路所帶練
勇二百名飭令會同文員查明各勇如願充兵
卽收入營伍給予守糧一分俟有制兵缺出陸
續頂補其有業可歸情願回籍者仍遵照

諭旨分別本省外省加給賞銀收繳器械派員管護
按程資送回籍交地方官妥爲安插其總兵慶

溥一路練勇

臣

亦飭知酌量情形先行分別入

伍遣撤隨後再將兩廣湖南官兵分起凱撤回

營至本省彈壓官兵應留者派委何員帶領在

於何處分駐

臣

現與提臣慶成酌商辦理奏入

上命軍機大臣傳諭吳熊光曰德楞泰由六百里馳

遞捷音奏報三省肅清餘氛掃蕩吳熊光發摺時

自尚未得此戴功喜信現在零匪全數撲滅惟逆

犯王作經王世貴苟朝九三名尙無下落或業被
殲戮或潛匿脫逃俱未可定該督仍當知會慶溥
等留心偵緝倘該犯潛入楚疆務須按名弋獲毋
任漏網卽係伊等之功至所稱楚省鄉勇客兵應
次第全撤本省官兵尙須暫駐彈壓等語所見甚
是此時搜捕事竣楚省邊境牧寧毋庸兵勇防守
所有征調客兵自宜分起凱撤練勇一項亦須分

別入伍遣散安爲安插其本省官兵應留若干如
何分別彈壓之處該督當籌商妥議酌留提鎮等
督率巡防該督卽可回武昌省城辦理地方事務
不必仍在邊境駐劄也

初六日

壬辰

上諭內閣曰昨德楞泰奏報剿捕川陝邊界零匪全
數肅清三省地方俱臻寧謐除軍營帶兵各員已

分別加恩獎賞外方維甸自擢任陝西巡撫以來
於搜捕零匪辦理糧餉及籌撤鄉勇各事宜均能
認真經理悉臻妥協伊從前原曾賞戴花翎緣事
革去著加恩仍賞戴花翎

十三日

己亥

勒保奏言竊平溪河打散餘匪分投

四竄經提督豐紳等督率文武四路偵緝茲外
委臧青雲等在規溝菜子坪等處殺賊三名擒

獲七名軍功趙文相在劉家坪盤獲四名又副
將桂涵等在光頭山殺賊二名擒獲二名難磨
千總余振海等在新田壩擒獲二名又擘獲革
退兵勇在外滋事之李應昌等七名另緝土匪
十一名又都司趙琴巡檢李暢等任觀音峽擒
獲零匪六名又隣水縣稟拿獲賊匪一名又竹
峪關守備馬林稟獲零匪一名太平廳稟獲零

匪一名大竹縣稟獲零匪一名均經分別審辦
刻下川省境內祇有桂涵等追捕打散賊匪係
被兵衝散者或十餘人或七八人又臧青雲所
追之賊尙有十餘人然此外或有棄械埋名零
星逃遁者仍嚴飭地方文武上緊緝捕再日
來節據劉清等稟報陝省撤勇已過綏定者共
有八起均經該司督同委員逐名查詢或當兵

充役或回籍安業俱給予文牌以次散歸極爲
安靜奏入

上命軍機大臣傳諭勒保曰勒保督飭各路文武逐
處搜捕陸續殲擒零匪土匪共四十餘名并將革
退兵勇在外滋事之李應昌等七名節次拿獲所
辦甚好惟據稱被兵衝散之賊或十餘人或七八
人又賊青雲所追之賊尙有十餘人此等打散餘

匪不可不趕緊搜緝且王作經等三犯安知不潛
竄川境設遇有面生可疑之人務宜認真盤詰果
實係難民卽行釋放斷勿任真賊漏跡漏網

十六日

壬寅

上諭內閣曰秦承恩奏盤獲吳錦榮一犯係江西豐
城縣人從前在湖北竹山縣貿易被賊匪裏脅而
刺白蓮教三字旋即逃出該犯不念家有母妻在

外遊蕩數年之久今始回籍恐另有別情秦承恩
已飛咨吳熊光俟查無別樣情節卽將該犯遞解
原籍起除刺字照不應重律折責三十板交親屬
保甲嚴加管束所辦甚是從前賊匪裹脅良民面
刺蓮花及白蓮教三字原係賊匪詭計使之別於
良民絕其歸意逼以不得不從經朕俯察其情屢
次降旨以賊匪中如劉之協王廷詔等皆真係白

蓮教從未聞顯有別識其面刺蓮花及白蓮教者
必非入教之人臨陣時不得濫行誅戮俾良民自
新有路今自大功告竣以後從前自賊中逃出者
紛紛回籍每有身列齊民而面刺字樣仍未消除
若不明示以革面洗心之道誠恐同居里黨見其
面有刺文目爲匪類不齒同類有意欺凌兼恐該
犯因有面刺字樣轉藉以惑衆驚愚別滋事故俱

不可不防其漸現在江西既有拏獲之犯則他省
似此者自復不少著各督撫轉飭地方官出示廣
爲曉諭如有從前被賊刺面未經銷毀之人卽令
自行起除勉爲良善倘經此次曉諭之後尙有甘
受賊玷不行毀除者一經查出照吳錦榮之例治
其不銷毀之罪嚴責示懲此乃朕愛護良民欲前
除青惡之至意著將此通諭知之

二十一日

丁未

德楞泰奏言竊

臣

於九月初一日

督兵回川已抵太平城口連日據搜捕陝境濫
河之王兆夢稟報各處均無賊蹤惟在板板寨
盤獲賊匪一名又據灤河天保寨民拏送賊匪
一名又兵丁石志高等在紅碕溝殺賊一名副
將桂涵等由兩扇門追捕賊匪兵丁范成禮在
石灰池拏獲賊匪一名又木瓜河寨民王育貴

等盤獲賊匪一名兵丁張朝榮等在黃安壩搜
獲賊匪二名又各路官兵陸續擊獲土匪六名
又准馬瑜報稱遊擊曾受等在大寧之關廟林
內搜獲偽總管李宗義一名在要壩拿獲散賊
一名副將馬應國在瑪坪趕殺賊匪二名藍翎
軍功譚國俸等在黃茅寺搜獲賊匪二名追殺
偽先鋒王玉恒一名都司史定川等在黃栢廠

搜殺賊匪一名又軍功李自得等在太平之李
家溝擊獲上匪四名又副將羅思舉在太平之
紅花溪擊獲偽總管伍應榜一名叅將劉彪稟
報把總童剛等協同寨民在乾河硎盤獲賊匪
一名又於林內擊獲四名都司高星文在修溪
壩盤獲賊匪一名鄉勇楊正魁在石馬溪擊獲
賊匪一名又據田朝貴報稱營糧員王堦之

差役在太平之月亮坪拏獲賊匪二名又革弁
馬倫常同千總趙洪周在朝陽碕拏獲賊匪二
名兵丁楊廷順在萬古寺衝天壘拏獲賊匪一
名又鄉勇包萬桐等在青草坪碕內盤獲賊匪
一名又鄉勇謝明禮殺賊一名鄉勇羅貴在黃
栢廠拏獲賊匪一名鄉勇楊貴在青灣子盤獲
賊匪一名藍翎馬兵楊秀在蔡家灣老林搜殺

賊匪一名又據馬國銳稟報分兵在大小寒溪等處溝洞內盤獲賊匪一名以上各略獲犯共三十五名首級九顆均已陸續押送到營分別查驗審訊獲犯內有偽總管伍應榜李得全李忠義李明興四名同其餘各賊匪臠割正法其繳來首級九顆內令趙洪周認出偽先鋒王玉恒鮮從先二名再查獲犯內有藏匿寨民汪士

義張友敬等家中被兵勇搜獲者

臣

傳到該寨

民曉以大義姑從寬各予重責諭以再犯必一

律正法並傳諭各寨硯如有查出送營自首者

不但免罪且加重賞又據臬司劉清副將羅聲

臬稟報把總張大倫協同巡檢李暢在觀音峽

林內搜獲逸匪二名又達縣軍功壯勇李元德

捕獲逸匪三名又東鄉縣壯勇杜榮等捉獲逸

匪一名一併解到訊明楊萬係僞總兵與其餘
各夥匪等分別正法

臣

查現在逸匪均係三五

零星棄械分逃至多者惟九十桂涵所追入川
之賊各有十餘名現在太平之鼓兒灣羊耳壩
老林有賽冲阿督同達自祥閻俊烈等併力搜
拏又楊遇春督同王兆夢等在八仙河一帶排
搜其開縣馬家營一帶老山已令守備謝金章

胡超等前往力搜現在各處分兵不下百數十
路逐日排搜無論苟逆散匪與夫從前各股一
二藏匿零匪並各屬滋事土匪均一律搜拏以
期淨盡再查前任守備今陞都司龍必達前因
不能約束兵丁經臣 叅

奏摘去花翎該員歷年管帶鄉勇打仗勇往又原
任守備王英因賊匪衝撲卡隘力敵堵住賊繞

道東遁奉

旨革職作爲兵丁効力贖罪查該員並無失卡畏蕙

請事且久歷戎行始終出力爲陝省鄉勇中出

色之人疊次痛剿賊匪極爲奮勇又原任守備

姜成龍前因未能約束鄉勇經臣叅奏革職作

爲兵丁示懲又原任千總馬倫常前因所帶官

兵被擄隱匿不報經臣查出叅革枷號該二員

等自叅革後隨征二載辛勤出力茲當全功告竣可否將該四員分別仰懇

施恩以昭獎勵奏入

上命軍機大臣傳諭德楞泰曰此次各路兵勇先後擒斬零匪等四十九名所辦尚好至摺內稱現將容留逸匪之寨民汪士義等均卽重責並諭以再犯必一律正法等語亦民等隱匿奸匪自應嚴行

查究但此等無識之徒若禁約過嚴恐遇有難民
來投亦概行拒絕希圖免罪則難民等窮無所歸
仍必流而爲匪轉非所以安輯善良之道況零星
打散賊匪往投寨砦正應令寨民擒獻或可藉此
弋獲賊目豈不甚善若明諭以不准容留則零匪
聞風遠颺又必潛匿深山老林更費搜緝著德楞
泰密行傳知各砦寨居人凡遇來投者俱詳細盤

詰實係難民卽予收留其中形跡可疑之人必當
留心查察一經訊係賊匪立時首獻定加獎賞其
有果能盤獲賊目者仍照賞格優獎如此愷切宣
導難民等藉可容身而零匪亦可不致兔脫倘愚
民仍前無知容留匪徒德榜泰查出後嚴究起意
容留之寨民治以應得之罪不必多有株連以免
拖累

同日

上諭內閣曰德楞泰奏前任守備今陞都司龍必達
原任守備王英姜成龍千總馬倫常自叅革後均
極出力現在全功告竣懇請加恩等語龍必達著
加恩賞還花翎王英著加恩賞還藍翎准其開復
遇有守備缺出卽行補用姜成龍著加恩賞給千
總頂戴馬倫常著加恩賞給把總頂戴均遇缺卽

補

二十五日

辛亥

勒保奏言查半月以來川東川北

一律寧謐惟據都司趙琴在新寧仁市舖普安

場等處盤獲逸匪三名又巴州軍功陳緯在鸚

鵒山盤獲一名又叅將羅思舉在雲陽之沙柁

子等處拏獲偽總管杜春一名軍功吳奇武等

在太平之石塘壩拏獲土賊四名均訊明分別

辦理此時實無二三十人成股之賊據差探各
路弁兵回報情形相同並稱老林中常有情急
自縊者可見該匪等已罪惡貫盈消亡就盡又
前獲苟新兒一犯據供本名董貴年祇十一歲
在開縣馬家營居住本年三月間被賊匪擄去
見了苟少元帥收爲義子取名苟新兒並不知
少元帥何名亦不知苟朝九下落等語自係弁

兵等查獲之時問係苟元帥之義子卽指爲苟朝九之子貫屬錯悞奏入

上命軍機大臣傳諭勒保曰勒保稱散竄之賊或三五人或十餘人自不值以大兵搜捕必當責成地方文武併力協緝從前查拏邪匪皆地方官辦理不善其實係習教者或得錢賣放如首逆王三槐曾經被獲旋卽賄縱此其明驗而並非習教者轉

被焚索誣陷以致激成事變流毒數年勞師糜餉
至今方得蕺事此時祇剩零星散竄之賊爲數甚
少若州縣各員再不實力督捕惟利自圖則是全
無人心矣勒保應責成地方官上緊嚴拏其緝捕
疎懈者卽嚴行叅處倘有營私圖利任意妄拏冤
抑良民者尤應從重治罪勿稍姑息其苟朝九王
作經王世貴三犯內若有一犯殲擒供証確鑿該

督卽速行傳知通省以某犯業經殲擒勿再輾轉
搜緝致有株累爲要至苟新兒如實係苟朝九之
子自應緣坐倘祇係苟朝賢擄掠收爲義子則其
罪尚輕著將苟新兒暫行監禁俟苟朝九被獲後
當面對質明確再行奏聞辦理

十月初三日

戊午

德楞泰奏言竊

臣

通行各路提

鎮及大小將弁地方文武以及大小寨洞隨時

隨處密緝零匪各處均無賊蹤惟據定遠廳稟
報巡檢王霖在元灘子盤獲賊匪一名又准豐
紳來信武舉熊文炳在兩扇門老林內搜獲散
匪一名又在紅花梁搜獲一名又雙龍寨寨民
等在老林內搜獲散匪一名在油榨坪拏獲偽
先鋒羅正懷一名又盤獲逸匪一名又在鹽廠
坪南龍寨等處陸續拏獲土匪九名又准馬瑜

并田朝貴具報候補守備郭成在放牛坪搜殺
賊匪二名千總趙洪周拏獲散匪一名藍翎兵
丁王貴朝在高觀寺盤獲零匪一名外委卓陞
在羅圈溪林內殺賊一名外委李剛在大楓坪
拏獲零匪一名又在七里溝等處盤獲散匪三
名又副將馬元在大寧之香坪溪殺賊二名內
一名經趙洪周認係偽總兵黎在朝又守備胡

超在雲陽屬之金子溝擊獲掌櫃李茂一名又在石埡子山內搜出賊匪一名自稱僞元帥魏思述查魏思述係賊營被害藍翎千總魏忠才之叔該犯原係早年習教元年起事時被魏忠才首告全家監斃魏思述脫逃入夥迄今春魏忠才等七人前往賊營苟文潤等尚知畏懼魏思述恨其從前出自遂將魏忠才等悉行戕害

胡超知係魏思述欲行生擒爲魏忠才等生祭
洩忿卽直前扭抱被魏思述拔出小刀扎戳四
處傷不甚重胡超始將魏思述按倒亦用小刀
連戳立斃割繳首級前來據趙洪周識認屬實
又據馬國銳稟報外委馬勝林在大紅山盤獲
散匪一名都司劉順盤獲散匪一名又據臬司
劉清等稟報巴州車功陳緯在鸚鵡山盤獲散

匪一名再九十桂涵等所追兩起散匪各有十
餘名由廟溝老林南向高頭壩羊耳壩跟蹤追
捕外委馬文貴殺斃一名千總盧仕榮殺斃一
名現有數路官兵分投搜捕諒斷不能漏網所
有解到獲犯均經訊明如老掌櫃李茂偽總管
蕭正龍偽總兵汪允成羅正懷四名轍割處死
其餘實係賊匪一概正法計此次川陝各路搜

獲散匪十六名土匪九名繳到首級八顆總期
搜剔淨盡以杜後患奏入

上命軍機大臣傳諭德楞泰曰此次各路員弁搜獲
散匪土匪等共有數十名所辦尚好守備胡超搜
出賊匪魏思述係戕害鄉勇軍功魏忠才等之賊
被該匪刀扎四傷該匪始得就殲實屬可嘉著德
楞泰存記遇有應陞之缺卽行陞用以示獎勵至

苟朝九王世貴王作經三犯德楞泰當督飭各路
鎮將員弁一體留心盤查務獲總期實有下落方
足憑信不可稍涉大意

初七日

王戊

吳熊光奏言查都司麻光裕及總兵

李天林處兩起鄉勇除入營外已分別本省外
省派令備弁護送回籍交地方官安插沿途極
爲安靜其總兵慶溥處練勇五百名亦據報分

別入營歸籍一體加賞銀兩陸續護送起程日
內已全行遣散所有防守楚界之兩廣湖南各
官兵自宜次第撤回現在兩粵官兵計二千三
百零一名擬作五起間一日行走一起各派副
將叅遊都司管帶俱就近送至宜昌府坐船前
進臣已派員妥協照料按例應付並飛咨廣東
廣西兩省轉飭經由各屬一體預備至湖南官

兵內有五百四十八名係寶慶協副將朱士奉
帶領駐劄鄖西縣防守此項官兵應作爲頭起
先行撤回現飭鄖陽府備船應付卽令朱士奉
起程回營其餘尚有湖南官兵九百三十二名
原在竹谿西路防堵刻下川省老林尚有一二
零匪恐其乘隙兔脫臣與慶溥商酌於提標及
鄖陽宜昌二鎮各撥一千名新舊配搭共足三

千名在於界連川陝之二竹房縣已東四屬原
設卡所分駐彈壓以免零匪透越容俟安設周
妥再將西路湖南官兵分作兩起接續遣撤再
查湖北竹山協副將呢瑪善前因追捕零匪行
走遲緩經臣叅奏欽奉

諭旨拔去花翎嗣該將在竹谿界外屢次奮力堵剿
將陝匪截回不使闖入楚境頗爲奮勉又原任

遊擊薛忠全前因賊匪竄至所管段內適值該
員出外搜山不能截獲亦經臣叅奏奉

旨拔去花翎降爲千總該員旋趕赴川境會同川省
都司史定川將此起零匪剿辦完竣年餘帶兵
防堵並無餘匪闖入又湖南永定營都司劉守

經因在營擅賣滋事民人王寅受傷不起案內

經臣叅革懲治該革員懇請隨營効力經臣發

交呢瑪善一路隨同堵剿甚爲奮勉茲當大功
全竣可否將該三員分別

施恩以示鼓勵奏入

上命軍機大臣傳諭吳熊光曰楚省現已肅清地方
寧謐吳熊光於鄉勇安插後卽將兩粵官兵分起
撤回所辦甚是其湖南官兵除五百四十餘名先
令副將朱士奉管帶回營外其原在西路防堵之

湖南兵九百餘名及鄖宜二鎮各撥兵一千名共
足三千於川陝連界處所分駐彈壓辦理亦是其
留防之兵不妨多駐數月以資搜捕俟探明川陝
官兵全行撤回再先將所留湖南兵撤回次將鄖
宜兩鎮配撥之兵陸續遣令歸伍

同日

上諭內閣曰吳熊光奏呢瑪善等在營出力懇請加

恩一節副將呢瑪善著賞還花翎降補千總之薛
忠全著卽以守備補用隨營効力之已革都司劉
守經著先賞給馬兵遇有外委缺出卽先行拔補
以示獎勵

十二日

丁卯

德楞泰奏言

臣

連日接據文武稟報

定遠廳兵役在毛埡塘盤獲零匪一名又在九
元關盤獲一名司獄錢奕範在青水河盤獲土

匪一名吳亨衍一路在倒溝洞等處拏獲散匪
二名又接豐紳來信副將馬文斌等屢次窮搜
只在小紅巖拏獲散匪一名其餘各處俱無賊
蹤又接馬瑜來信把總周文炳在橫山子拏獲
散匪二名又在密柴河殺賊一名拏獲偽總兵
張正富一名守備張萬林在大寧之涂家壩盤
獲零匪一名副將馬應國在東鄉之廟灣子殺

賊一名又據田朝貴稟報外委王明達等在旗
桿山殺賊一名把總雷文體在大黃山搜獲零
匪一名軍功嚴陞等在回軍壩擊獲土匪一名
藍翎馬兵楊秀等在火地坪一帶追殺賊匪一
名拏獲白號偽總兵栗福龍一名都司龍必達
等在八臺山拏獲散匪一名叅將李應元等在
銀廠坪殺賊一名又在二聖巖殺賊一名千總

郭來等在朝陽坪殺賊一名候補知縣王堦在
漁溪河盤獲散匪一名又據馬國銳稟報外委
劉興成在元梁搜獲散匪一名千總盧仕榮外
委馬文貴等在火地坪追殺賊匪二名又守備
張洪成等在香爐寨盤獲土匪一名興隆寨民
拏獲零匪一名都司趙琴在新寧之仁市舖盤
獲逸賊一名又獲土匪二名臣均經訊明分別

辦理

臣

現在賽冲阿楊遇春並王兆夢達自祥

九十咨報陝境自鎮坪起至寧遠廳止東西一

帶連日分兵往來櫛比排搜俱無遺孽實已全

境肅清並查民間現俱修葺房屋各安生業等

情至於川境連日各路搜剔零匪散匪土匪時

有所獲而王世貴王作經及苟朝九三逆尚在

未獲

臣

現又酌擬將沿邊內外地方各分段落

督搜查自太平之劉家坪起至三排山旗桿山
修理山梭羅寨三溪子濛濛溪馬踏坪雙河口
大小寒溪仰天窩雪沱王家壩蓼子口明通井
鷄鳴寺寒溪寺南坪線朗坪放牛廠乾河溝貝
母池西流溪大水沱包穀廠西流溪腦厚朴山
雙坪十里坪新開場火山甕坪仙女池張果老
坪止以上三十四處爲一段交馬瑜田朝貴督

搜其太平界上高觀寺起至渭溪河石羅灣攔
路寨密車河亢河腦西溪口水寨子耍壩老鴉
舖熟油溪加單池黃安壩石梅子河漁溪河兩
扇門木瓜河黃溪河豬頭岡紅巖寨中崗溪楊
泗巖雞毛舖羊耳壩高頭壩鍋兒灣猴子寨半
河老鴉口南溪止以上三十一處爲一段交豐
紳馬國銳督搜其自太平後坪起至剪刀架大

寧之新田壩官棚子開縣之大小添紫城內外
團城大小黃溪漆棚子十二垵大寧之渣羅盤
紅池壩核桃壩麻柳壩木匠坪王道河後溪河
東溪河關廟山和崗溪一院泉大小峪河黑水
河七里甲湯家壩桐油壩黃連垵桃木坪百里
荒麻柳三灣木盛河茶山壩長茅嶺寒水壩分
水嶺朝陽碕上三壩尖山壩九臺坪龍灘河止

以上三十九處爲一段交雷仁督搜其自開縣
雪泡山起至葱子坪大埡口流水溝貓兒梁馬
家營楊柳池龍門洞白馬堯城滿月槽界嶺南
埡場八把刀三栢嶺亮埡子鹿塘溪鴨圈門中
崗嶺譚家壩七里坪黃栢廠白沙河腦四方碕
關廟山秀才口高坪風竹壩朝陽坪鍾鼓溪水
許寨青灣子止以上三十二處爲一段交副將

馬元桂涵督搜其自太平八臺山起至曹家溝
水古壩花岳山萬壽坪廟坡白菓壩江西壩老
麥池茨竹溪栢枝山栢森坪小白沙河廖家坪
秤桿溪柯家坪涼風埡郭家壩千家河止以上
十九處爲一段交副將羅思舉督搜似此川陝
沿邊以及川境腹地山邊均有官兵梭織巡邏
則王世貴等三逆自可水落石出並飭令於各

卷之三
段交界之處隨時會哨將山林有無藏匿餘匪
地方是否平定之處按五日一報出具鈐結以
憑查核設探有餘匪蹤跡毋論段落地界當協
力擒拏如隱匿不報巡查疎懈卽行嚴叅究辦
奏入

上命軍機大臣傳諭德楞泰曰川陝邊界地方經德
楞泰督同文武員弁上緊搜緝此次殲獲逸賊土

匪等共又有三十餘名所辦尙好現在陝省雖無
遺孽川境尙應搜捕德楞泰於沿邊內外地方分
爲五股酌派提鎮等帶兵督搜自應如此辦理但
該提鎮必須實力搜捕不可視爲具文目下天氣
漸寒山中雨雪不時尙官兵等畏難不出惟事株
守仍屬虛耗鹽糧有名無實若有此等情弊卽行
嚴叅辦理其苟朝九王世貴王作經三犯仍當隨

時留心盤查將來於何人所分段落盤獲卽係何人之功

二十二口

丁丑

勒保奏言查賊氛解散之後附近

綏定腹地一帶時有盤獲之犯節據都司趙琴

拏獲四名麻柳場巡檢李暢拏獲一名廣安州

錢國瑞拏獲一名東鄉縣楊世鰲拏獲一名大

竹縣袁士繡拏獲二名渠縣王衍慶拏獲二名

現經臬司劉清審訊將此內偽總兵周順禮一
犯同其餘旗手矛手並曾充鄉勇逃回疊肆搶
刦各犯分別凌遲正法其餘訊明並未殺人及
被擄未久各犯亦分別發遣安插又有太平廳
同知鍾蟠雲拏獲軍營落後鄉勇殺人分贓之
梁明德馬貴二犯亦經劉清訊明正法此外尙
有外委龍必魁在太平廟灣拏獲夥騙鄉民之

各營落後人夫李貴等十六人均已嚴審究辦
並據達縣余承寧盤獲王騰坤一名供係本年
八月間隨同苟朝九等一路六人在賊營逃散
分手等語臣令劉清卽速嚴審根究苟朝九下
落務期弋獲並將王騰坤暫留備質

同日吳熊光奏言查自竹谿直達巴東邊境共
二千餘里道路綿長從前陰條嶺至相思嶺六

處卡座原係兩廣官兵在彼協防茲粵兵業經
凱撤而西路邊境較之南路更爲遼遠擬撥鄖
陽鎮標官兵一千名在於川陝交界由陰條嶺
起至二竹西南一帶原設營卡處所分駐防守
卽令鄖陽鎮總兵慶溥居中董率並撥宜昌鎮
標官兵一千名在於興房交界之相思嶺烏雲
頂起至巴東之界嶺一帶分駐防守卽令宜昌

鎮總兵吉林泰居中董率提臣慶成督飭副將
呢瑪善帶領提標官兵一千名於鄖宜所屬邊
境往來調度查察以期周密倘有兩汛相離過
遠不能接續之處卽於鄖宜鎮屬沿邊大小塘
汛原設及新添弁兵內就近派撥聯絡聲勢俟
川陝老林實無一匪再將各路官兵以次撤回
至各兵分駐處所相距原營均在二三百里及

千餘里不等山中食物昂貴尙宜加之體恤應
請白零匪搜淨撤回彈壓之日起官弁止支本
身及跟役鹽糧馬乾裁去馱折兵丁於應支口
糧之外每月祇支鹽菜銀九錢裁去加賞銀四
錢及夫價銀兩其餘丁鹽糧仍照舊支給其兵
糧先將各寨碯存貯之米就近運伊如有不敷
再動用各縣倉儲米石以次接濟再

臣據副將

呢瑪善稟報在於界外陝境老林搜獲零匪劉
亭環等三名并殺斃賊匪一名

臣

親提查訊據

劉亭環供稱係襄陽縣人在張天倫股內充當
矛手張天倫殲斃後衆人推爲偽總管逃往四
川與王世貴合夥本年六月內又與羅思蘭苟
文潤合夥羅思蘭被擒後趙洪周又將苟文潤
殺死我乘間逃出如今只有王世貴并苟文潤

營內老掌櫃王作經同剿剩賊匪數十人零星
分散逃往四川至賊夥內並無苟朝九其人等
語又據巴東縣寨民譚繼相等拏獲匪犯劉士
善一名訊明後均分別辦理均奏入

上命軍機大臣傳諭勒保曰此次川省地方文武拏
獲零匪又有數十名內惟王騰坤一名供係本年
八月間隨同苟朝九一路六人在賊營逃散分手

等語該犯既與苟朝九六人分散除王騰坤一人
拏獲外其分散之五人卽有苟朝九在內或分或
合此時想尙在川省竄匿勒保應卽飭令劉清向
王騰坤根究苟朝九實在下落並將王騰坤暫留
俟拏獲苟朝九時以備指認至王作經王世貴二
犯本日據吳熊光奏拏獲賊匪劉亭環曾經與王
世貴合夥並供如今只有王世貴並苟文潤營內

老掌櫃王作經同剿剩賊匪數十人分散逃往四川等語是王作經王世貴二犯亦總在川省逃匿均應與苟朝九一併嚴拏務獲勒保仍應遵照前旨懸立賞格通飭地方文武認真搜拏將該三犯按名擒獲不可因已報蒞功稍有鬆懈

上命軍機大臣傳諭吳熊光曰據奏獲犯劉亭環供稱該犯前在四川太平會與王世貴合夥如今只

有王世貴并苟文潤營內老掌櫃王作經並無苟朝九其人等語本日據勒保奏訊據獲賊王騰坤有本年八月間隨同苟朝九六人在賊營逃散之供是苟朝九一犯已有蹤跡可尋豈得謂之並無其人且苟朝九六人內只獲王騰坤一名尙有五人隨處潛逃冀延殘喘又安知不因被捕緊急逃逸楚境吳熊光與慶成慶溥等亦當嚴飭各卡隘

照舊懸立賞格隨時留心盤究若能弋獲苟朝九
等三犯卽係吳熊光慶成慶溥等之功現在楚省
沿邊各要隘自仍應安設官兵以資巡察俟來年
春融後川陝地方一無零匪然後將本省防兵撤
令歸伍至官兵設防處所皆係老林人烟稀少食
物昂貴若將應得之項遽行節減未免餬口維艱
所有楚省設防官兵著加恩照征兵分例給予用

示體卹

上又命軍機大臣傳諭德楞泰曰本日據吳熊光勒保所奏情節苟朝九王作經王世貴三犯均尙在川省邊界一帶潛匿該犯均係著名首逆德楞泰務應於拏獲各犯時究明苟朝九王作經王世貴等下落迅速督率各鎮將等於深山老林內嚴密排搜仍遵前旨懸立賞格將該首逆等按名弋獲

勿任漏網此外零星竄匪不過數十人本屬無幾
惟當分派官兵逐處窮搜不可坐待賊來始行捕
獲德楞泰應通飭帶兵各員奮勉搜剔不得以時
屆寒冬冰雪凝滑稍爲鬆勁

二十八日

癸未

德楞泰奏言竊

臣

督飭搜捕零匪

據總兵九十稟報兵丁王順盤獲零匪一名三
元寨寨民搜獲零匪二名又據豐紳來信兵丁

崔倬等在牛蹄嶺林內搜獲零匪一名又兵丁
馮光順於夜間在小漆扒山邊拏獲一賊情急
拔刀自盡割取首級一顆又兵丁高陞在南溪
新寨子拏獲王三槐股內旗手黃坤一名又據
遊擊畢萬年等稟報捕獲土匪七名兵丁李勝
龍等在官亭盤獲零匪一名外委黃得榮陳士
陞等同獲土匪一名該犯供出同夥四名亦已

一併拏解又守備張澤洪在南溪拏獲土匪一
名兵丁雷萬春在太和場飯店內盤獲零匪一
名又據總兵馬國銳稟報外委傅鵬程在舊院
壩盤獲高二股內零匪一名遊擊湯占先在蕎
壩嘴拏獲零匪二名千總岳熙誠在栢枝山拏
獲零匪一名都司左住拏獲土匪一名又據總
兵田朝貴稟報兵丁王受在七里溝大柵子盤

獲土匪二名兵丁王貴在石臺觀拏獲土匪一
名兵丁趙士俊等在花藥溝拏獲張士龍股內
矛手張大受一名候補千總楊貴等在河口巖
搜出賊匪二名持矛拒捕戮傷楊貴左腿當被
外委李登榮兵丁苟俸殺斃割取首級呈驗又
兵丁向廷元拏獲陳朝觀股內零匪一名候補
守備郭成等在八臺山搜出零匪二名外委魏

起龍拏獲零匪一名又據副將羅思舉稟報孔
總李剛在開縣之陞子溪拏獲土匪二名守備
張洪成拏獲土匪五名又城口都司謝成貴經
歷朱向榮拏獲零匪二名又接馬瑜來信兵丁
召斌拏獲零匪一名守備伍魁英兵丁胡喜龍
在黃中堡拏獲零匪一名又遊擊熊敏謙在青
花溪長壩拏獲土匪四名又都司趙琴盤獲藍

號旗手周朝富一名達縣巡檢李暢盤獲假裝
乞丐之徐添德股內零匪苟時亭一名渠縣知
縣王衍慶盤獲土匪二名東鄉縣知縣楊世燾
盤獲零匪一名大竹縣知縣袁士繡盤獲零匪
一名又據候補知府理藩同知李發祥稟報在
通巴界上拏獲零匪一名並土匪三名均經
逐一訊明查驗分別辦理所有獲犯之兵勇寨

民均隨時照格給賞臣查現在分兵五路在於

太平大寧開縣山山校織搜拏實爲周密卽再

有一二潛匿匪徒臣難漏網

德楞泰勒保奏言臣陝境業已肅清卽川境零

匪亦已搜捕殆盡臣當查照額勒登保原奏將

滿漢征防官兵次第遣撤臣德楞泰現卽移咨

提督楊遇春馳赴漢中將應先撤陝省西面之

官兵四千七百餘名調至郡城分別遠近分起
遣撤並就近造具花名清冊移咨本省督撫查
照辦理俟川省令匪搜捕淨盡後再將陝省後
起應撤之滿漢兩步官兵五千五百八十餘員
名卽令賽沖阿領全行撤回本營其留防官
兵四千一百名仍照前奏交楊遇春督辦分段
彈壓以專責成再查川省隨征鄉勇尙有一千

八百餘名刻下應於大兵未撤以先全行遣撤
惟額勒登保前此遣撤陝省鄉勇時外省者遵
旨給賞銀十兩本省者給銀五兩嗣本省各勇以從
征較久再三哀懇遂又格外調劑奏明加給銀
一二兩五錢迨至興安郡城陝安道德明額知府
龍萬育等見其衣履破爛不堪又復捐給帽子
馬褂大衫小衣鞋襪各一套該勇等始歡欣感

激而去其時

臣

督兵在陝所有川省鄉勇無不

共見共聞此次遣撤川省鄉勇自應照此一律

辦理而該勇等又多受數月勞苦是以

臣

等往

來商酌本省者每名再加賞銀二兩五錢足成

十兩之數使其謀生有貲不致流蕩所需不過

多費數千兩現據該管將備造具花名年歲籍

址清冊前來已派提督馬瑜同知府積朗阿馳

赴綏定再會同臬司劉清安爲辦理其川省征
防官兵俟鄉勇遣竣亦應分別辦理查川省所
留征防兵一萬二千名除陣亡受傷殘廢病故
陸續遣撤外現在尙有一萬有零此內尙有由
苗疆而來者隨征最久又有老弱患病寄留調
養者此兩項約有三千餘名應於鄉勇撤完後
卽令丁憂副將馬應國先行帶領回營以均勞

逸尙有新陳官兵七千餘名以之分路搜巡再
俟搜捕事竣擬將日久征兵酌撤三千名令松
潘鎮總兵馬國銳帶領回營其餘官兵四千餘
名擬以新陳搭配分爲三段川東一帶交重慶
本鎮總兵雷仁川北一帶交川北鎮總兵田朝
貴其城口爲兩省通中之地卽令提督豐紳扼
駐督率各段與陝楚防兵巡邏會哨其時臣德

楞泰擬赴綏定再於川東川北各處周歷巡閱
安撫百姓查察地方俟明春防兵撤後再行遵

旨回任至此外陝省各路軍營尙有外省將佐員弁

如廣西遊擊李廷珍貴州遊擊璩嘉驥馬伏全

等三員現無經手事件臣等已咨行楊遇春令

其各回本任其川省各路軍營尙有外省員弁

山西副將王威寧等十三員大半均由川省亦

弁擢陞今職現有帶兵搜捕者亦有防守嘉陵
江岸者俟零匪淨盡官兵全撤時臣等亦卽飭
令回任以重操防

德楞泰又奏言遵查都司朱承受等六員係楊
遇春一路員弁該員弁等打仗殺賊素爲勇往
茲蒙

皇上格外鴻施

特予鼓勵不惟該員等感激無地卽川陝將弁無不
歡感奮興實於搜捕大有裨益查都司朱承受
一員已得花翎可否

恩賞以遊擊遇缺卽補先換頂戴守備朱福壽一員
已得花翎可否

恩賞以都司遇缺卽補先換頂戴其藍翎外委寧顯
文李洪春二員可否

恩賞以把總遇缺卽補其陝西兵丁王進敘平涼兵
丁蕭貴二名可否懇

恩賞戴藍翎謹遵

旨分別保奏均奏入

上命軍機大臣傳諭德楞泰勒保曰此次德楞泰分
撥官兵在於山內梭織巡查又經搜拏零匪土匪
六十餘名惟有首逆苟朝九王世貴王作經三犯

其餘留防官兵應俟來歲春融及苟朝九等三犯就獲或得有實在下落方可全數裁撤

同日

上諭內閣曰都司朱承受等打仗殺賊素爲勇往朱承受著加恩以遊擊陞用遇缺卽補朱福壽著加恩以都司陞用遇缺卽補俱著先換頂帶藍翎外委甯顯文李洪春俱著加恩以把總陞用遇缺卽

補其兵丁王進敘蕭貴亦著加恩賞戴藍翎以示
鼓勵